

Gobernador a papia cu minister Plasterk pero

Nada concreto pa soluciona impasse Hulanda y Aruba



ORANJESTAD – Gobernador Fredis Refunjol a papia ayera cu Ronald Plasterk, e minister Hulandes encarga cu Asuntonan di Reino. Pero te awor no tin nada concreto riba mesa cu por bisa tin un solucion na caminda pe impasse entre Hulanda y Aruba.

E quick scan di e presupuesto ta cla cu un resultado negativo. Den e Koninklijk Besluit (KB) tin diferente opcion kico gobernador di Aruba por haci. Mester bisa cu ainda falta e rapport definitivo cu e team di personanan di secretariado di CFT ta trahando riba dje. E resultatonan mester ta cla den e siman di 25 augustus. Pero ayera e ex-minister di Finanza Juan David Yrausquin atrobe a informa Bon Dia Aruba cu gobierno su prohibicion riba su trahadornan pa coopera cu e investigacion ta keda vigente. Cualquier ambtenaar cu ta coopera, ta actuando empugna di nan mesun compromiso cu gobierno y cu tin reglanan cla pa loke ta consecuencia, segun e ex mandatarario.

Manera conoci gobernador Refunjol a bay Hulanda pa reuni cu Consejo di Ministernan di Reino riba e impasse cu actualmente tin pa

cu e 'ehecucion di e investigacion di e presupuesto 2014'. Mester bin un solucion mas pronto pa sali for di e impasse, segun gobernador. E problema ta kico lo haci awor cu gobierno di Aruba ta keda riba su punta di no colabora y ta prohibi tambe su trahadonan di colabora.

Presupuesto supletorio

Un otro punta ta cu e KB di gobierno di Reino a duna gobernador un instruccion di haci e investigacion di si e calculacionnan den e presupuesto (pues no solamente esun di 2014) y e desaroyo di e finanza publico den e añanan ta realistico. Cu e quickscan e contesta caba cu esun di 2014 no ta sirbi y tampoco ta bala pene mas pa traha un nobo. E investigadonan a propone pa traha un presupuesto 2015 cu si ta realistico, tene cuenta cu nan recomendacionnan y cu parlamento ta aprob'e prome cu fin di aña. Y pa fin di aña tambe bin cu un presupuesto supletorio pa cambia e momento ey e presupuesto di 2014. Locual gobierno di Aruba den su contesta ta haya un bon idea tambe. E ta algo cu e ultimo añanan tabata e modus operandus di gobierno pa bin cu presupuestonan lat y na final di aña (hasta riba 30 december) bin cu un presupuesto supletorio pa legitima na ultimo e gastonan cu a

surpasa e presupuesto inicial.

Proceso

Pero e biaha aki e gobierno si mester colabora cu locual ta sali for di e investigacion. Esaki ta para den e KB. Ora e rapport definitivo ta cla mester manda esaki di biaha pa minister di Finanza di Aruba y pa Consejo di Ministernan di Reino. Despues gobernador por invita e gobierno di Aruba pa bin dentro di tres siman cu un ley di presupuesto nobo pa 2014 sea un ley (presupuesto supletorio) cu e cambianan necesario pe ley original. En caso cu minister di Finanza no ta contesta dentro dos siman cu lo bin cu un ley nobo sea un ley cu cambianan, gobernador no ta warda mas y mester dicidi di biaha si ainda lo firma e presupuesto 2014 sea lo aplica articulo 21 di Reglement voor de Gouverneur van Aruba. E ultimo kermen cu gobernador ta nenga di firma e ley y e peticion aki lo bay Consejo di Ministernan di Reino pa evalua. Tambe lo puntra consejo di Raad van State. Despues e Consejo di Ministernan di Reino por dicidi cu toch mester firma e ley di presupuesto sea wordo



cancela.

Parlamento

Ora gobierno di Aruba si ta coopera y ta bin cu un ley di presupuesto nobo pa 2014 (awor esaki e chens ta chikito cu e consejo tambe di CFT pa no haci'e) of bin cu un ley cu cambianan, esaki ta bay den e procedura normal. Pues Raad van Advies mester bin cu su consejo atrobe, gobierno cu su contestanan y despues lo entrega pa parlamento. Si parlamento ta aproba e ley, esaki no ta nifica cu gobernador ta firma automaticamente. Por ehemplo si e ley cu cambianan atrobe no ta una realistico y si parla-

mento ta djies aproba, gobernador por warda atrobe pa firma e ley aki. Esaki tambe ta para den e KB. Y atrobe e gobernador ta wordo instrui di haci un investigacion si e ley supletorio aki ta realistico. Y e gobernador atrobe por dicidi na final si e ta nenga di firma e ley aki y mand'e pa Consejo di Ministernan di Reino pa tuma un desicion final. Asina e circulo ta rond.

Riba potretnan por wak gobernador Refunjol hunto cu minister Plasterk (para riba potret) y tambe hunto cu minister Plenipotenciario Alfonso Boekhoudt na Aruba-huis na Hulanda. □